

DOMINGU XVI TEMPU KOMÚN – TINAN A

Tema

Liturjia Domingu da-16 Tempu Komún nian konvida ita atu deskobre Maromak ne'ebé pasiente no nakonu ho laran-sadia, ne'ebé lakohi ema maksalak nia marjinalizasaun, maibé ninia integrasaun iha comunidade “Reinu” nian; no konvida ita, liuliu atu interioriza Maromak nia “lójika”, hodi husik nia marka ita-nia hateken ba mundu no ba ema sira.

Leitura dahuluk ko'alia mai ita kona-ba Maromak ida ne'ebé, kbiit-na'in no beran boot, maibé Nia laran sadia no mamar ho ema sira – maski sira halo buat aat. Hodi halo nune'e, Maromak konvida ita nia oan sira atu sai “umanu”, katak, iha fuan ne'ebé sadia no mamar hanesan Maromak nia fuan.

Evanjellu garante prezensa “Reinu Maromak nian” iha mundu ne'ebé labele fila ba kotuk. “Reinu” ne'e la'ós klube ezkluzivu ida ema “di'ak” no “santu” sira-nian: iha nia ema hotu – di'ak eh aat – hetan possibilidade atu buras, atu hatasak sira-nia hilin, atu grasa kona sira, to'o momentu opsaun definitiva nian.

Leitura daruak subliña, ho forma seluk, Maromak nia bondade no mizerikórdia. Nia afirma katak Espíritu Santu – don Maromak nian – mai tulun ita iha ita-nia fragilidade, hodi gia ita iha dalan moris nakonu nian.

LEITURA I – Sab 12,13.16-19

“Livru Sabedoria” nian mak livru resente liu Testamentu Tuan nian (aparese durante sékulu dahuluk nia klaran mK). Ninia autór – judeu ida língua grega nian, provavelmente moris no simu edukasaun iha Diáspora (Alexandria?) – hodi esprime an iha termu no hanoin mundu eléniku nian, halo eloju ba “sabedoria” israelita, trasa kuadru ba sorte ne'ebé kona ema justu no ema aat abanbairua no deskreve sorte lahanesan ne'ebé kona pagaun sira (idólatra) no ebreu sira (fiél ba Jahwéh). Ninia objetivu iha rua: hodi diriye ba ninia kompatriota judeu sira (hela iha paganizmu, idolatria, imoralidade), nia konvida sira atu deskobre hikak beiala sira nia fiar no valór judaiku sira; hodi diriye ba pagaun sira, nia konvida atu haree idolatria nia folin-laek no adere ba Jahwéh, Maromak loos no mesak... Ba sira hotu, Jahwéh de'it mak garante “sabedoria” loos no ksolok loos.

Testu ne'ebé propoin mai ita pertense ba parte datuluk livru nian (kf. Sab 10,1-19,22). Hodi uza téknika midrash nian, autór halo komparasaun entre kastigu sira ne'ebé Maromak lansa kontra “em aat sira” (pagaun sira) no salvasaun ne'ebé rai hela ba ema “justu” sira (Maromak nia Povu).

Autór hahú hodi hatudu oinsá Maromak nia “sabedoria” manifesta an iha istória Israel nian (kf. Sab 10,1-11,14). Iha kontraste, nia deskreve oinsá Maromak trata ema Ejitu sira (kf. Sab 11,15-20) no idólatra kananeu sira (kf. Sab 12,3-19). Testu ne'ebé propoin mai ita halo parte períkopa ikus nian.

Kananeu sira mak, iha perspetiva israelita sira-nian, rasa aat ida no maksalak, ne'ebé halo krime aat liu, ritu foer, oho sira-nia oan rasik (kf. Sab 12,4-5). Maski Maromak bele halakon sira ho kastigu (kf. Sab 12,9); maibé nia retarda tanba fó ba sira oportunidade atu arrende no troka moris (kf. Sab 12,8.10).

MENSAJEN

Jahwéh hatudu ninia moderasaun boot no manifesta ninia bondade, mizerikórdia, justisa. Maromak la tenke fó prova ba ema sira basá la iha ema ida bele husu konta ba nia; se Ninia hahalok hanesan ne'e, katak ho forma ekilibrada no moderasaun, ne'e tanba Nia mak Maromak ida justu. "Justisa" iha Testamentu Tuan, la'ós aplikasaun loloos lei nian; maibé liuliu fidelidade ba esénsia rasik. Maromak nia esénsia mak domin, bondade no mizerikórdia; tanba ne'e, justu ba Maromak katak revela domin, benevolénsia no bondade iha Ninia atitude ba ema sira.

Buat ne'ebé significativu liu iha ne'e mak "Maromak nia justisa" la fó ba Maromak nia Povu maibé ba povu aat, moris mai iha ona salan laran (kf. Sab 12,10): ne'e mak universalidade salvasaun.

Husi sorin seluk, autór haree iha komportamentu "justu" Maromak nian lisaun ida ba Israel. Maromak hanorin sá loos ba nia Povu?

Uluknanai, hanorin katak Maromak lakohi ema maksalak nia mate, maibé atu nia konverte an no moris, "taka matan" iha ema nia salan nia oin, atu konvida nia ba arrendimentu.

Daruak, Nia hanorin katak "ema justu tenke sai belun ema sira nian" (Sab 12,19): se Maromak nia lójika mak lójika ida perdaun no laran-sadia nian, Maromak nia Povu tenke adopta lójika hanesan no asume atitude bondade nian, domin nian, laran-sadia nian, toleránsia nian, iha relasaun komunitária sira. Laran-di'ak no komprensaun la'ós de'it ba ema di'ak sira maibé mós ba sira ne'ebé halo nafatin salan.

LEITURA II - Rom 8,26-27

Durante domingu ruma ona mak Paulo propoin mai ita katekeze ida kona-ba dalan atu tuir atu bele simu salvasaun ne'ebé Maromak oferese. Salvasaun mak Maromak nia don ida, don gratuitu nu'udar fuan husi Maromak nia laran-di'ak no domin (kf. Rom 3,21-5,11). Salvasaun to'o mai ita liuhusi Jezús Kristu (kf. Rom 5,12-8,39); no atua iha ita liuhusi Espíritu ne'ebé Jezús hasuli ba sira ne'ebé adere ba Ninia projetu no tama iha Ninia comunidade (kf. Rom 8,1-39) –komunidade Reinu nian.

Iha domingu kotuk, Paulo konvida sarani sira atu deside ba moris "tuir Espíritu". Opsaun ne'e soi dimensaun kósmika no tulun atu manán dezikilíbriu sira no dezarmonia ne'ebé estraga Maromak nia kriasaun. Ne'e mak dalan difisil ida, ezije haka'as an, hakribi an, purifikasaun, renovasaun moris nian.

Oinsá mak sarani ida moris opsaun ne'e? Kbiit atu moris tuir Espíritu nia bele hetan husi ne'ebé?

MENSAJEN

Maromak mak haraik mai ita kbiit atu moris "tuir Espíritu", maibé ita tenke husu beibeik ba Maromak grasa ne'e.

Loloos, ita dalabarak la hatene atu husu saida, ita dalabarak la konsege dixerne entre "morits tuir isin" no "moris tuir Espíritu". Espíritu Santu rasik mak "mai tulun ita iha ita-nia frakeza" (vers. 26a). Sá mak Nia halo? Oinsá Paulo entende Espíritu nia intervensaun kona-ba ne'e?

Testu la espísitu. Tuir interpretasaun ida, ita iha difikuldade atu haktuir ita-nia dezeju no neseidade sira no Espíritu mak enkarregadu atu formula iha ita-nia fatin dezeju no neseidade sira-ne'e. Interpretasaun seluk dehan, Espíritu tau hamutuk ho Ninia intersesaun ita-nia halerik sira, atu nune'e ita-nia orasuan to'o ba Maromak. Buat ne'ebé improtante mak Espíritu sai ita-nia mediadór efikás iha ita-nia diálogu ho Maromak. Nia mak ita-nia "intérprete" , intersesór, hasa'e ba Maromak ne'ebé koñese ita-nia fuan. No orasaun ne'e

(ne'ebé Espíritu dirije iha ita-nia fatin) Maromak nafatin simu, basá tuir Ninia planu no projetu sira (vers. 27).

EVANJELLU – Mt 13,24-43

Ita kontinua ho “aikanoik sira Reinu nian”. Evanjellu ohin nian apresenta mai ita bloku ida tan ilas eh komparasaun tolu ne'ebé revela realidade “Reinu” nian.

Iha domingu kotuk ita haree ona tansá Jezús haklaken liuhusi “aikanoik sira”.

Husi aiknaoik tolu ne'ebé ohin propoin mai ita, rua (mostarda musan no fermentu) mai husi tradisaun sinóptika; ida seluk (aikanoik trigu no duut aat) hetan de'it iha Mateus (aleinde hetan mós iha koleksaun antiga Jezús nia “liafuan sira”, koñesidu ho “Evanjellu Tomé” nian). Ita haree iha-ne'e Mateus nia preokupasaun “pastoral”; nia la'ós jornalista ne'ebé hakerek loloos kedas Jezús nia liafuan ida-idak; maibé “bibli-atan” ne'ebé buka “ezorta”, anima, hanorin no habiit ninia comunidade sarani nia fiar.

MENSAJEN

Aikanoik dahuluk mak trigu no duut aat (vers. 24-30). Kuadru haktuir ema ida kuda fini di'ak iha nia to'os, inimigu ida kuda duut aat no atan sira ne'ebé dedika an, preokupa ho rezultadu abanbairua nian. Buat hotu normál; buat ne'ebé la normál mak to'os-na'in nia reasaun ba “krize”; nia fó orden atu husik trigu sai boot ho duut aat no iha tempu atu ku'u fuan mak sei haketak di'ak atu rai no ida aat atu sunu.

Jezús iha ninia ministériu, Nia konvive ho ema maksalak, ema sira iha ninin, sira ne'ebé moris morál laloos. Nia han hamutuk ho ema maksalak boot, husik sira kona Nia, konvida publikanu ida atu integra iha grupu dixípulu sira-nian... Ho komportamentu “eskandalozu” ne'e, Nia hakarak dehan ba ema hotu ne'ebé relijiaun ofisiál despreza katak, Maromak hadomi sira no konvida sira atu halo parte ba Ninia família, atu integra iha comunidade salvasaun nian, atu sai membru ho direitu tomak iha comunidade “Reinu” nian.

Farizeu sira konsidera inaseitavel Jezús nia atitude. Ba sira, ema ne'ebé la kumpre Lei tenke esklui husi Maromak nia Povu santu no la iha direitu atu halo parte ba Maromak nia “to'os”.

Farizeu sira nia lójika la la'o ho Maromak nia lójika. Maromak nia lójika la'ós lójika destruisaun nian, segregasaun nian, ezkluzo nian, maibé “lójika” domin nian, mizerikórdia nian, toleránsia nian. Jezús Kristu nia Maromak mak Maromak ida pasiente no laran sadiana'in, neineik atu hirus no riku iha mizerikórdia, ne'ebé nafatin fó ba ema sira oportunidade hotu atu harii filafali sira-nia ezisténsia no integra an tomak iha comunidade “Reinu” nian. Nia soi planu salvasaun no grasa nian atu oferese gratuitamente ba ema hotu; hafoin, iha tempu oportunu/loos nian, sei haree sé mak ema aat sira no sé mak ema di'ak. La'ós fasil atu haketak di'ak husi aat, tanba realidade rua ne'e eziste hamutuk iha “to'os” hotu, iha ema sira nia fuan hotu.

“Na'i” aikanoik nian mak Maromak nakonu ho pasiénsia, fó oportunidade hotu ba ema sira, lakohi ema maksalak nia mate, maibé hakarak nia konverte no moris.

“Atan” sira ho laran-manas naresin demais mak sarani sira (ne'ebé servisu iha “Na'i” nia to'os) laran toos no laho toleránsia, la iha kapasidade atu hateke ba mundu no ema sira nia fuan ho laran-di'ak, hakmatek no pasiénsia Maromak nian.

“To'os” mak mundu no istória, iha ne'ebé moris hamutuk trigu (sinál sira esperansa nian, moris nian, domin nian ne'ebé nakfilak mundu sai furak no haksolok liután) no duut aat (sinál sira mate nian, responsavel ba ema ida-idak nia terus, opresaun, moris-atan). To'os mak ema nia fuan mós, ho kbiit ba opsau sira vida nian no ho kbiit ba opsau mate nian.

Jezús garante: Maromak nia métodu sira la'ós kastigu kedas, intoleránsia, inkomprensaun ba nia oan sira nia salan; Maromak nia métodu mak husik ema moris eh buras iha liberdade, integra an iha komunidadade Maromak nia oan sira nian.

Iha vers. 36-43, ita iha aplikasaun Mateus halo kona-ba aikanoik trigu no duut aat nian ba komunidadade nia moris.

Iha “esplikasaun” ne'e, eixu sentráal aikanoik orijínal nian buat seluk fali. Problema la'ós iha Maromak nia lójika maibé iha kestaun “juizu”/tesi-lia nian ne'ebé ema di'ak no aat sira sei hetan: Mateus insiste katak iha “loron ku'u fuan nian”, ema di'ak sira sei simu rekompensa no ema aat sira sei simu kastigu.

Ita iha finál sékulu I (dékada 80). Entuziazmu tempu uluk nian liu ona; komunidadade nia moris marka ho monotonia, ho falta entuziazmu no empenhu, ho mediokridade, ho laxizmu. Sarani sira la moris di'ak sira nia fiar. Oinsá fanun fali sira-nia entuziazmu inisiál?

Mateus uza métodu pregadór sira ninia tempu nian... Ho linguajen no símbolu apokalipse nian, Mateus fó hanoin ba sarani sira ninia komunidadade nian kona-ba Maromak nia juiziu abanbairua. Símbolu nia uza (sunu duut aat iha ahi-lakan boot, tanis no ruun nehan) iha objetivu atu impresiona fiar-na'in sira, obriga sira atu troka sira nia eskema moris nian no fila fali ba fidelidade ba Evanjellu. Tanba ne'e, iha-ne'e ita laiha deskrisaun ida oinsá “mundu remata”; iha-ne'e ita iha konvite urjente no emosionadu ba konversaun, ba aprofundimentu kompromisu ho Jezús no ho Evanjellu.

Evanjellu domingu ne'e nian propoin mai ita aikanoik rua seluk: aikanoin mostarda musan (vers. 31-32) no aikanoik fermentu nian (vers. 33). Aikanoik rua ne'e hanesan iha konteúdu no iha forma.

Ita bele haree iha rua hotu katak la iha proporsaun entre inísiu no rezultadu finál. Fini mostarda nian mak fini ida ki'ik liu, maibé husi nia moris ai-hun boot ida; fermentu iha aspetu insignifikante, maibé iha kapasidade atu fermenta kuantidade boot massa nian. Komparasaun rua ne'e serve atu apresenta dinamizmu “Reinu” nian. “Reinu” Jezús haklaken hanesan fini no fermentu: parese realidade insignifikante, maibé soi potencialidade atu hakonu mundu, atu nakfilak no hafoun nia.

Ho aikanoik sira-ne'e, Jezús hatán ba ema sira ne'ebé la fiar katak karpinteiru Nazaré nia mensajen ne'e bele hamosu proposta ida moris nian ho kbiit atu fermenta mundu no istória. Realidade “Reinu” nian iha duni kbiit atu nakfilak mundu.